



REPUBLIKA E SHQIPËRISË  
AUTORITETI I KONKURENCËS  
KOMISIONI I KONKURENCËS

VENDIM

Nr. 758, Datë 28.12.2020

**“Mbi autorizimin e përqendrimit të realizuar nëpërmjet përfimit të kontrollit të shoqërisë ApNet SHPK nga shoqëria ABCom SHPK.”**

Komisioni i Konkurrencës me pjesëmarrjen e:

Znj. Juliana LATIFI	Kryetar
Znj. Leida MATJA	Zv/Kryetar
Z. Eduard YPI	Anëtar
Znj. Adriana BERBERI	Anëtar

Në mbledhjen e tij të datës 28.12. 2020, shqyrtoi çështjen me:

**Objekti:** Autorizimi i përqendrimit të realizuar nëpërmjet përfimit të kontrollit të shoqërisë ApNet SHPK nga shoqëria ABCom SHPK.

**Baza Ligjore:** Ligji Nr. 9121, datë 28.07.2003 “Për Mbrojtjen e Konkurrencës”, i ndryshuar, nenet 2, 10-12, neni 24, germa d, nenet 53-64 dhe neni 73, pika 1, germa dh. Rregullorja “Për zbatimin e procedurave të përqendrimit të ndërmarrjeve”, Udhëzimi “Për formën e njoftimit të përqendrimit”, formulari i njoftimit të përqendrimit.

**Komisioni i Konkurrencës**, pas shqyrtimit të relacionit të Sekretarit të Përgjithshëm si dhe raportit të Drejtorisë së Analizës dhe Metodologjisë së Tregjeve, mbi njoftimin e përqendrimit të realizuar nëpërmjet përfimit të kontrollit të shoqërisë ApNet SHPK nga shoqëria ABCom SHPK.

VËREN SE :

**Transaksioni dhe përqendrimi**

Pranë Autoritetit të Konkurrencës, është depozituar njoftimi lidhur me përfimin e kontrollit të shoqërisë ApNet SHPK nga shoqëria ABCom SHPK.

Sipas kontratës së shitblerjes së kuotave të datës 06 mars 2020 , palët në transaksion janë:

**Pala Blerëse:** ABCom SHPK, është një shoqëri me përgjegjësi të kufizuar, e themeluar sipas legjislacionit shqiptar, e regjistruar më datë 08.01.2001. Objekti i shoqërisë është të ideojë, zbatojë

dhe të menaxhojë rrjete të telekomunikacionit dhe transmetimit të të dhënave dhe interkoneksionet në përgjithësi, të sigurojë shërbime audio dhe/ose audiovizive etj

Në kohën kur është nënshkruar marrëveshja, ABCom zotërohet nga American Broadband B.V, një shoqëri private me përgjegjësi të kufizuar e themeluar në shtetin e Holandës. Sot shoqëria ABCom SHPK zotërohet nga ortakët e saj i vetëm Vodafone Albania SHA.

**Target:** ApNet SHPK është një shoqëri me përgjegjësi të kufizuar, e themeluar sipas legjislacionit shqiptar, e regjistruar më datë 10.03.2020. Objekti i shoqërisë është ofrimi i shërbimit të komunikimeve elektronike, kryesisht transmetime televizive kabllore dhe shërbime marketingu për palë të treta.

*Pala Shitëse:*

**Shitësi 1:** Intel Media SHPK është një shoqëri me përgjegjësi të kufizuar, e themeluar sipas legjislacionit shqiptar. Objekti i shoqërisë është shërbime në lidhje me turizmin, online marketing, programim dhe implementim që lidhet me produkte digjitale, ndërmjetësim ndërmjet klientëve dhe provider të moduleve teknologjike të prenotimeve online. Shoqëria Intel Media SHPK është zotëruese e 15% të kapitalit të shoqërisë ApNet SHPK

**Shitësi 2:** Teeb-Center SHPK është një shoqëri me përgjegjësi të kufizuar, e themeluar sipas legjislacionit shqiptar. Objekti i shoqërisë është ofrimi i shërbimeve telefonike të lëvizshme dhe të palëvizshme në shkallë kombëtare, shërbime radioje, shërbime globale të komunikimeve, eksport, import të mallrave të ndryshme. Shoqëria Teeb-Center SHPK është zotëruese e 85% të kapitalit të shoqërisë ApNet SHPK.

Më datë 06 Mars 2020 është nënshkruar marrëveshje “Kontratë Shitblerje Kuotash” ndërmjet shoqërisë ABCom SHPK dhe shoqërive Intel Media SHPK dhe Teeb-Center SHPK.

Sipas kësaj marrëveshjeje, Shitësit janë pronarë të 2 kuotave, që përfaqësojnë 100% të kapitalit të shoqërisë target tek shoqëria ABCom. Shitësit do të shesin 2 kuotat dhe pas datës së nënshkrimit Intel Media SHPK dhe Teeb-Center SHPK do të transferojnë 100% të titullit të pronësisë mbi kuotat bashkë me të gjitha të drejtat e tjera të votës dhe të drejtat e dividendit tek shoqëria ABCom SHPK.

Shoqëria ABCom SHPK do të përftojë kontroll të plotë mbi shoqërinë ApNet SHPK dhe duke qenë se ABCom SHPK zotërohet tashmë nga Vodafone Albania SHA, atëherë Vodafone Albania SHA do të përftojë kontroll indirekt mbi ApNet SHPK.

Njoftimi i përqendrimit është depozituar pranë Autoritetit të Konkurrencës jashtë afatit 30 ditor nga lidhja e marrëveshjes, e parashikuar në nenin 12 pika 2 e Ligjit dhe pala blerëse ka kryer kundërvajtje administrative e parashikuar në nenin 73, pika 1, germa dh) e Ligjit.

### **Vlerësimi i konkurrencës**

Transaksion i njoftuar plotëson kriteret e përcaktuara në nenin 10 dhe 12, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar dhe si i tillë kërkohet autorizimi nga Komisioni i Konkurrencës.

Referuar nenit 3, pika 7, të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar, si edhe Udhëzimit Nr.76, datë 07.04.2008 “Për përcaktimin e tregut përkatës”, treg përkatës i produktit u konsiderua tregu i transmetimeve televizive dhe treg përkatës gjeografik u konsiderua territori i Republikës së Shqipërisë.

Transaksioni i propozuar është përftimi i kontrollit të shoqërisë ApNet SHPK nga shoqëria ABCom SHPK. Pas realizimit të përqendrimit, ApNet do të shndërrohet në filial të ABCom dhe për rrjedhojë do të bëhet pjesë e Vodafone Group.

Ndërmarrja ApNet është krijuar në mars të vitit 2020 dhe për rrjedhojë nuk ka realizuar të ardhura për vitin financiar 2019. Si pasojë, pjesa e kombinuar e tregut të shoqërisë ABCom pas përqendrimit nuk do të ndryshojë.

Tregu i prekur nga transaksioni është tregu i transmetimeve televizive. Referuar të ardhurave që ka realizuar ABCom SHPK nga aktiviteti ekonomik gjatë vitit 2019, transmetimet televizive përbëjnë vetëm 28% të xhiros së ndërmarrjes dhe tregu i prekur nga transaksioni nuk do të ketë ndikim të ndjeshëm në aktivitetin e shoqërisë ABCom në tërësi.

### **PËR KËTO ARSYE:**

Komisioni i Konkurrencës, në bazë të nenit 24, shkronja d, nenit 56 pika 1 dhe neni 73, pika 1, germa dh të Ligjit Nr. 9121, datë 28.07.2003 “Për Mbrojtjen e Konkurrencës”, i ndryshuar,

### **VENDOSI:**

1. Të autorizojë përqendrimit e realizuar nëpërmjet përfimit të kontrollit të shoqërisë ApNet SHPK nga shoqëria ABCom SHPK.
2. Vendorsjen e gjobës mbi shoqërinë ABCom SHPK në masën 0.2 % e xhiros së vitit 2019 ose 3,986,270 ( tre milion e nëntëdhjete e tetë mijë e dyqind e shtatëdhjetë) lekë.
3. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.

### **KOMISIONI I KONKURRENCËS**